

Gobernador a nenga di firma presupuesto



ORANJESTAD – Firma di Gobernador di Aruba, como hefe di gobierno, ta necesario pa legalisa contenido di presupuesto di pais Aruba. Hecho cu e contenido di e presupuesto no ta cumpli cu e promesanan haci cu Hulanda, gobernador a nenga di pone su firma bou di e presupuesto.

Les e detayenan riba pagina A3

Minister Financia a sali pa reuni urgente cu Gobierno Hulandes

Gobernador a nenga di firma presupuesto di Aruba

ORANJESTAD – Pa e hecho cu e contenido di e presupuesto no ta cumpli cu e promesanan haci cu Hulanda, gobernador di Aruba a nenga di pone su firma bou di e presupuesto. Su firma (como hefe di gobierno) ta necesario pa legalisa e contenido. Simultaneamente, Hulanda a manda yama minister di Financia Juan David Yrausquin pa duna splicacion y wak kico por haci ainda pa logra toch pa firma e presupuesto.

Bon Dia Aruba a haya tur esaki confirma ayera, aunke e fuentenan a pidi pa no divulgar nan number. Ta custumber cu un dia despues cu e presupuesto keda aproba, gobernador ta firma su maneece, como un tipo di legislacion 'urgente'. Pero esaki no a sosode. Y ora cu a bay averigua, a resulta cu gobernador no a firma pa e motibonan menciona.

Entre e problemanan pakico gobernador no a firma, ta figura cu e presupuesto no ta uno realistico, y no por mira ningun caminda unda cu ta cumpli cu promesanan haci cu gobierno Hulandes pa cu reduccion substancial di gasto. Mientras cu gobierno en berdad a logra reduci su gastonan cu 100 miyon florin, e reduccionnan aki ta riba e post nan robes, pues no a enfoca e reduccionnan corecto.

Un di e posibilidadnan cu gobierno lo a faya, ta pa reduci mas den coordinadornan y otro posten cu Hulanda ta



considera mas importante y crucial.

Repasa presupuesto

Entre nan tin un post di Apfa (pensioen ambtenaar) di 30 miyon cu ainda no a keda regla, aunke cu gobierno a muestra cu esaki lo keda cla. Pues a haya e señal bon cla cu gobierno mester a reduci e aparato gubernamental cu mucho mas di loke a haciba, pero a abstene di esaki. Sea consciente of no consciente. Tur e problemanan aki lo por a wordo resolvi, segun Bon Dia Aruba a compronde, si entre otro a acepta e mocion di oposicion y laga Raad van Advies repasa e resultado di e presupuesto (despues cu a trata esaki door di parlamento).

E hecho cu na prome instante a rechasa e comentario di Raad van Advies, y a manda e presupuesto bek pa gobernador, intacto, no a cay den bon tera cerca gobernador, segun Bon Dia Aruba su fuentenan a revela. Ta conoci cu e momento ey, gobernador (pa prome biaha) a manda e presupuesto bek, pero no a haya oido cerca gobierno.

Como tal aworaki e palabra tabata na gobernador cu mester a firma e presupuesto na nomber di Rey, pero a nenga di haci tal, te ora cu e presupuesto haya un bachi diferente, y cu cierto adaptacionnan (e biaha aki si) tuma luga. Esaki mester converti e presupuesto den uno mucho mas realistico, y mester pensa

tambe den un presupuesto di mas aña (meerjarenbegroting) y finalmente, pa e presupuesto wordo scrutina pa un instancia independiente.

Ademas Bon Dia Aruba a haya informacion fidedigno cu si despues di e bishita di minister Yrausquin na Hulanda, no logra haya otro riba e acuerdonan ainda, Rijksministerraad lo cay aden. Algo cu ta conoci for di februari ora cu e mandatario di Financia a bolbe di Hulanda.

Problema

Cu e desaroyonan aki, gobierno ta sinta dilanti di un problema mas grandi awor, mirando cu parlamento ta drentando reces, vakantie ta cuminsa y e holoshi ta con-

tra nan. Aki dos siman, Rijksministerraad mester di un clarificacion final sino tin tur indicacion cu gobierno Hulandes cay aden. Esaki tabata e mensahe cla cu nan a manda durante e ultimo reunion cu nan a tene. Rijksministerraad ta tene nan reunion un biaha pa luna, y ultimo reunion a trata e asunto y a muestra cu e deadline pa gobierno di Aruba tin su presupuesto cla, ta ora cu e reunion siguiente tuma luga.

Aprobacion parlamento

Tabata diamars anochi ora cu, cu 13 voto pro y 8 contra, e presupuesto trata a wordo aproba den sala di parlamento.

Mesora gobierno a indica cu esaki ta un presupuesto cu ta cumpli cu tur e reglanan y palabracionnan haci, tanto na Hulanda como a envolvi e resultado di e dialogo social. A critica oposicion pa nan falta di participacion constructivo y a mas bien desbarata nan cu nan comportacion.

Ora cu e presupuesto a keda aproba, comentarionan di afo tabata cu, esaki no ta e fin y cu awor lo tin cu wak si gobernador ta firma esaki si of no. Bon Dia Aruba a compronde for di siman pasa cu tabatin posibilidad cu gobernador lo no a firma esaki si e no tabata un presupuesto realistico. Pero a mira si toch lo a logra trece cambio ainda.

Como tal a warda mira kico finalmente ta loke ta sosode. Pero manera por a mira, nada no a pasa y a aproba e presupuesto manera cu e la keda presenta. □